

Riflessions in merit de violence etniche LA RESON DAI STUPITS

Ogni violence e je une reazion inmotivade, esagjerade, irazionâl. Ma and'è une che siguramentri e je la piês di dutis, la plui umiliant par chel che al è vitime e la plui infamant par chel che le invie. Parcè che no partìs di un alc che mi à fat chel altri ma di un alc che al scate in me apene che o viôt chel altri. E je la violence etniche, la discriminazion raziâl, la malegracie cuintri di un che nol à nissune colpe reâl ma dome al è fat diferent di me.

Le à clamade "la ragione degli imbecilli", la reson dai stupits, parcè che dome un stupit al pò cjapâse cuntun che al è nassût di un pari e di une mari come me, al à une inteligence e un cûr, al parten a la famee umane e no a chês des simiis e al à la mê stesse dignitât, il gno stes dirit di vivi. O no?

Al è chi che al scate chel mâl cancar, chês malatie orende, chês brute robe che si clame violence etniche. Tal pensâ, che chel altri nol veti la mê stesse dignitât, i miei stes dirits di vivi, di lavorâ, di pensâ e vie.

In cheste gnot de reson, in cheste fumate dal çurviel, si impie une lampadine cence fii, une idee che in Realtât e je une mancjance di ideis. Un vignetist al à volût rapresentâ une schirie di çurviei di personis diferentis par profession o par ideis politichis. Ognun al veve la sô part di materie grise. Cuant che al à rapresentât il razist, si à viodût che dentri di chês crepe, in chel çurviel al jere il çondar assolût, la mancjance di ogni segnâl di inteligence. Chel vignetist al à capît benon la cuistion.

Cheste lampadine rote che (no) si impie intal çurviel çondar dal razist e je che i oms no son compagns. E chest al è vêr e positif. Ma soledut no son compagns te dignitât e tal dirit, parcè che and'è oms (pôcs) nassûts par comandâ e oms (tancj) nassûts par ubidî. And'è classis superiôrs e classis inferiôrs. And'è che a nassin parons e and'è che a nassin sotans. Par cuâl reson? Merits culturâi? Inteligence? Superioritât morâl? Santitât? Nancje par idee. A nassin sotans dome parcè che a àn une muse, un colôr di piel, une forme di vôi o di nâs che nol è compagn dal nestri. Il delit al è dut culî e dut culî al è il dirit di maltratâju, tibiâju, pestâju, parâju vie come cjans, doprâju, lassâju muri di fan. Piês che no lis bestiis, parcè che pes bestiis la diviersitât di raze e je une ricjece, come che in Realtât al è, ma che si lu dinee cuant che si trate dai oms. A proposit di bestiis, al è vonde usuâl il câs che il razist al deventi amî pai nemâi e ju trati come o miôr des personis, umiliant e violentant cussì tant i oms che i nemâi. Hitler, che al à ordenât di svinidri il popul ebraic e fat murî millions di fruts, al deventave mat pai cjans pastôrs e cuant che i è muart un canarin al è colât in svaniment.

Hitler, judât di Rosenberg e simiotât de piês raze di inteletuâi vendûts dal sec. XX, comprendût cualchi luminâr (distudât) talian, al à inventade la pantiane de raze pure, che e sarès la ariane, che e veve di ridusi in sclavitût o fâ sparî dutis lis altris, tacant de raze gjudaiche, par fâ sù un mont di macacos ducj bionts, alts, cui vôi colôr cîl, ben pecolâts e cence cûr nè anime nè çurviel. Stranamentri l'inventôr de raze pure al jere il mancul adat a fevelâ, parcè che, no par colpe sô, al veve sanc bastardât, cun tune ponte di chel sanc ebraic che lui tant al odeave.

Se Hitler al è rivât al eces e a la farneticazion, and'è stâts altris che a àn doprade la peraule di Diu, la bibie, par disonora Diu e la sô creature primarole,

l'om. In Americhe and'è ancjemò int convinte che Diu, blanc, al à creade la raze blancje come raze privilegjade e la raze nere o metice come robe di seconde o di tierce categorie e a varessin cjatât un rimpin intal fat di Cam, un dai fîs di Noè, chel che lu à ridût cuant che al jere cjoc (Gjen 9, 20-26), par justificâ la depuartazion di milions di neris des forestis splendidis da l'Afriche a lis maladetis plantagjions merecanis. Il Klu-Klux-Klan al è la ponte di diamant di cheste alte culture cence mani e cence pudôr.

Dongje di chescj, che a son i câs plui emblematics, o podaressin zontâ mil altris câs. Cuant che la Spagne o il Portugal o la France o l'Inghiltere e levin atôr pal mont a imponi cu lis sclopis la lôr paronance politiche e il lôr sisteme di vite, no lu fasevin par salvasi l'anime salvant l'anime dai "païans", ma par resons economichis che a partivin di une clare autocussience di superioritât su la int di colonizâ e civilizâ. Ancje se chei a vevin une culture e une civiltât ben plui antighe e refinide. La colonizazion e jentre in chest telâr di violence etniche.

Si pò dî duncje, cence pore di sbalgjâsi, che la violence etniche e je viere come la storie dal mont, dal moment che simpri al è esistût cualchi mat o cualchi popul che al veve il carûl di jessi nassût par comandâ e par fâsi servî al di là di ogni dirit e merit. Cheste malatie nus cjape dentri ducj, come e plui dal varuscli, parcè che e cjape dentri plui i grancj che no i piçui, plui chei che a varessin di resonâ che no chei che a son inmò masse zovins. Di fat la canae e rive a cjatâ chê comprehension, chê colegance o feeling che nô no rivìn.

Se e cjape dentri ducj, ancje se no volin ametilu e ognun al fâs profession solene di tolerance, nus riguarde ancje nô. Ognun di nô. E riguarde i talians tai confronts dai slâfs e dai extracomunitaris in gjenerâl. O clamin int foreste a fâ lis voris che nô no volin fâlis plui parcè che o sin diventâts siôrs e massepassûts e ur disin, sore, che a vegnin a robânus i puescj di vore. Nol è infrequent il câs che la massàrie africane o filipine o ucraine e vedi studiât tant plui de parone, che le trate come une çavate dome pal fat che e je massàrie e che e scuen gloti par dibisugne.

Al è infetât di cheste malatie de violence etniche chel che si rifâs a la grandece e a la fatalitât di Rome, a la superioritât de religion cristiane rispjet a altris religjons. Al è malât ta l'anime il talian che al rive intun ufizi e, dome pal fat che al è sentât di là de scrivanie, al trate la int cun malegracie e al considere il furlan come un salvadi. Al è malât il sitadin che al sbelee la int di païs, il studiât che al rît il contadin e l'operari, il predi che al maltrate e al ufint la int. Al è malât il furlan che al sbelee il cjargnel, ma ancje il tumiecin che al coione la int dai cjanâi.

Cuant che o jeri plevan a Val e Rualp e a Treli, a vignivin dispes int di Udin a domandâmi se o cognossevi cualchi fantate serie e brave che e varès podût là a servî. Dome un razist e un stupit al pò pensâ che il Signôr o la nature a vedin creât lis feminis cjargnelis e di païs par sopuartâ la supierbie des cagonis di citât.

Rimiedis? Nol è facil e nol è dit che la stesse midisine e fasi ben par ducj. Personalmentri o tacarès cui ameti di jessi malât e duncje cu la necessitât di curâmi. Se no pues gjavâ la volence etniche che e je tal mont, o cirarai almancul di no fâ cressi il grum cu lis mès miseriis e tristeriis.

La fonde di dut e je la supierbie, reonzude di ignorance. Duncje la midisine juste e je la umiltât di ricognossi che jo no soi miôr di chei altris e che lôr a àn dirit di vivi come me. Plui si studie cun serietât e obietivitât e mancul si è raziscj. La diversitât etniche e à di inviâ un confront positif e no une ostilitât stupide e mortificant.

Chel che al è sul puest nol à di crodisi paron esotic e chel che al rive al à di vê il sintiment di adatâsi almancul a lis robis esteriôrs e fundamentâls. Al razisim classic, che al siere la parte a ducj i forescj, si sta sostituint un razisim plui refinât e pericolôs: chel di molâ i bregons e di tirâsi in bande nô. Un chel al siere la parte denant dal forest al è maleducât. Un che, par vignî incuintri al forest, i dâ ancje la femine, al è un mauc. Il forest nol va tratât nè miôr nè piês di nô, ma come nô. Nol è serio gjavâ i segnâi religjôs, comprendût il Crist o lis fiestis, par vignî incuintri ai musulmans.

O sieri cheste tabaiade cuntun fregul di sapience bibliche, che e reste la miôr. “No sta fai malegraciis al forest e no sta tibiâlu, parcè che ancje vualtris o vês stât forescj te tiere dal Egjit” (Es 22, 20). Se o cjâlìn lis fotografiis di mieç secul indaûr, i emigrants, lis cjasis e la int, so redut i fruts, no sin cuissà ce diferents dai extracomunitaris di vuê.

“O ai vude fan e mi vês dât di mangjâ; o ai vude sêt e mi vês dât di bevi; o jeri pelegriin e mi vês sotetât, crot e mi vês vistût” (Mt 25, 35). San Martin, nestri titolâr e model, dant mieze de sô manteline al par (extracomunitari?), al à taponât Crist in persone. “La tiere e je mê e vualtris o sês forescj e fituâi in cjase mê” (Lv 25, 23). L’aiar, il soreli, la tiere, la vite..., a son un ben di ducj e par ducj.

La cuistion no je facile e scontade. E domande buine volontât, inteligjence, passience, tolerance, creance di une bande e di chês altre. E sarà la cuistion principâl dai agns che o stin frontant, simpri plui multietnics e multiculturali. Cîrînt di fânt une grande ocasion di cressite e no une sconfite de reson, de religjon e de umanitât.

pre Antoni Beline